

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!
Yeshua is die hart van die Vader!

Parashah 49: Ki Tetze (כִּי תֵצֵא): Wanneer jy uitgaan.

Wanneer jy in geveg uittrek teen jou vyande en יהוה, jou God, hulle in jou hand gee en jy hulle as gevangenes wegvoer..... Deut. 21:10 – PWL¹

Torah: Deut. 21:10 tot 25:19

Haftorah: Jes. 54:1 tot 10

Nuwe verbond: Matt. 5:31 en 32; Matt. 19:3 tot 12; Matt. 22:23 tot 32; Matt. 7:1 tot 5; Mark. 4:24; Mark. 10:2 tot 12; Luk 10:29 tot 37; Gal. 6:2; 1 Kor. 11:2 tot 15.

Hierdie notas is aanvullend tot die vorige notas vir Parashah 48 wat afgelaai kan word by: [Parashah49Notas14](#) of by [Parashah49Notas15](#).

We must be ready to allow ourselves to be interrupted by God.....We must not.....assume that our schedule is our own to manage, but allow it to be arranged by God — Dietrich Bonhoeffer.

God is not a God of the emotions but the God of truth — Dietrich Bonhoeffer.

Silence in the face of evil is itself evil: God will not hold us guiltless. Not to speak is to speak. Not to act is to act — Dietrich Bonhoeffer.

¹ Alle teksverwysings is geneem uit PWL (Pad van Waarheid tot die Lewe) Vertaling, behalwe waar anders vermeld. Die PWL Vertaling kan gratis afgelaai word by www.padwlewe.ch, maar is ook in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by padwlewe@yahoo.com of telefonies by 074 361 2134 gekontak word.

Midrash (Torah Bespreking)

Twee Soorte Saad

Jy mag nie twee soorte saad in jou wingerd saai nie, of die volle opbrengs van die saad wat jy gesaai het en die vermenigvuldiging van die wingerd, sal onrein word. Deut. 22:9.

Die goeie saad is die Woord van YHVH wat deur die Saaier, Yeshua Messias, gesaai word (Matt. 13:37). Hierdie Woord is die saad van die waarheid en wanneer dit in vrugbare grond gesaai word, sal dit ontkiem en 'n goeie oes van vertroue en gehoorsaamheid voortbring. Dit is hierdie goeie saad van waarheid wat ons hoor, en bewaar om dit te doen wat van ons die afgesonderdes van YHVH maak (Joh. 17:17). Hierdie waarheid sal elkeen vrymaak (Joh. 8:32) om YHVH die Vader se wil te doen soos gehoorsame kinders en wat van ons 'n geskikte bruid maak.

Hy wat die goeie saad gesaai het, is die Seun van die mens en die land is die wêreld. Die goeie saad is die kinders van die Koninkryk, maar die vals saad is die kinders van die bose een. Matt.13:37 en 38.

Reeds in Lev. 19:19 het ons gelees dat ons nie ons akker met gemengde saad mag saai nie. Ons elkeen is 'n sinnebeeld van die akker van YHVH en woorde (dit wat ons hoor en lees) is die saad. Daar is die goeie saad van YHVH en daar is die saad van onkruid van Satan. Dit herinner ons aan die gelykenis wat Yeshua vertel het:

- 24 *'n Ander vergelykende storie het Hy aan hulle vertel en gesê: "Die Koninkryk van die hemel is soos 'n man wat goeie saad in sy land gesaai het,*
- 25 *maar terwyl die mense slaap, het sy vyand gekom en darrel (vals koring) tussen die koring gesaai en weggegaan.*
- 26 *Toe die blare opgroei en die spruitjies vrugte vorm, toe verskyn die darrel ook.*
- 27 *Die diensknegte van die meester van die huis het na hom toe gekom en vir hom gesê: 'Ons meester, let op, het u dan nie goeie saad in u land gesaai nie? Waar kom die darrel dan vandaan?'*
- 28 *Hy antwoord hulle: 'n Vyandige persoon het dit gedoen.' Die diensknegte sê vir hom: 'Wil u hê dat ons moet gaan en dit uitsoek?'*
- 29 *Hy antwoord hulle: 'Is dit nie dat as julle die darrel bymekaarmaak, julle ook saam met hulle die graan sal ontwortel nie?'*
- 30 *Laat altwee saam groei tot die oestyd toe en in die oestyd sal ek vir die maaiers sê: Maak eers die darrel bymekaar en bind dit in bondels om dit te verbrand, maar maak die graan bymekaar in my skuur.'"*
- Matt. 13:24 tot 30*

Satan is die vyand wat in die nag kom, terwyl die mense geestelik slaap, en ongesiens onkruid tussen die koringsaad saai (Matt. 13:25 en 39). Nadat hy dit gesaai het gaan hy weg, want hy weet dat die onkruid saam met die koring sal groei. Hy weet dat hy die saad van onkruid in vrugbare grond gesaai het.

Die woord vir *onkruid* in die oorspronklike Grieks beteken *drabok* (*darrel*). Hierdie plant lyk in baie opsigte net soos koring, maar is nie koring nie. Drabok is dus *vals koring*. Dit is eers wanneer die drabok begin saad vorm dat dit deur die oplettende kenner van die koring onderskei kan word. Daarom kon drabok nie uitgeroei word terwyl die koring groei nie, want dit lyk nie net soos koring nie, maar die wortels daarvan raak ook verstrengel met die van die

koring. Indien daar gepoog sou word om die drabok tydens die groeistadium uit te roei, sal die koring ook beskadig word. Dit is dus beter om beide die koring en draboek van mekaar te skei wanneer daar geoes word. Drabok se saad is bitter en wanneer genoeg daarvan geëet word, het dit ondermeer die effek van 'n slaap- en susmiddel.

Die onkruid wat deur Satan gesaai word is dus 'n namaaksel van YHVH se Woord en is derhalwe nie die waarheid nie, maar leuens en misleiding. Satan saai dus vals leerstellings daar waar die waarheid verkondig word. Hy saai dit in die nag, naamlik daar waar daar nog geestelike duisternis weens 'n gebrek aan kennis van YHVH se Woord is, maar wel 'n soeke na die waarheid bestaan. Dit is vrugbare grond. Die mense se harte is ontvanklik daarvoor omrede dit soos die waarheid lyk. Die waarheid en die leuen groei dus in dieselfde vrugbare grond.

Onthou dat Satan net soveel leuens met die waarheid sal meng, dat die leuen steeds soos die waarheid sal lyk. Heuning wat 'n klein bietjie gif bevat, sal steeds soos heuning lyk en proe, maar is nou vergiftigde heuning. Indien jy genoeg daarvan eet, sal jy siek word en moontlik sterf.

Hierdie vergiftigde waarheid wat Satan saai, dien as 'n geestelike susmiddel en wat selfs geestelike slaap kan veroorsaak. Gelowiges ontvang hierdie halwe waarhede met die oortuiging dat dit die volle waarheid is. Hulle is oortuig dat hulle YHVH in gees en waarheid dien. Hulle is egter besig om ongeregtheid te doen (Matt. 13:41) sonder dat hulle dit besef. Derhalwe dien hulle nie YHVH in gees en waarheid nie, want hulle is mislei. Hulle het 'n ywer vir YHVH Yeshua, maar hulle ken nie YHVH se geregtigheid nie.

want ek getuig van hulle dat hulle 'n ywer vir God in hulle het, maar nie in kennis nie ³ omdat hulle die onpartydige opregtheid van God nie ken nie, maar hulle eie onpartydige opregtheid probeer oprig; daarom het hulle die onpartydige opregtheid van God nie gehoorsaam nie. Rom. 10:2 en 3

Hierdie vergiftigde waarheid word vrylik deur sommige geestelike leiers gesaai. Mense met 'n geestelike honger word aangegryp deur wat hulle sien en hoor. Hulle ondervind 'n emosionele, geestelike of fisiese ervaring en kom onder die oortuiging dat dit die waarheid is. Dit wat hulle ervaar oorheers dit wat die Woord van YHVH leer. Ten spyte van goeie bedoelings word hulle die ontvangers van die draboksaad. Weens 'n gebrek aan kennis, en omrede hulle YHVH se Torah soos dit in Yeshua Messias volbring is nie onderhou nie, gaan hulle te gronde en verkeer in geestelike ballingskap:

My volk word vernietig weens gebrek aan kennis. Omdat jy kennis verwerp het, sal Ek jou ook as My priester verwerp. Aangesien jy die wet van jou God vergeet het, sal Ek ook jou kinders vergeet. Hos 4:6.

Hulle fees-etes is met lier en harp, tamboeryn, fluit en wyn, maar hulle gee nie aandag aan die dade van יהוה nie en die werk van Sy hande oorweeg hulle nie; daarom gaan My volk in ballingskap weens hulle gebrek aan kennis, hulle eerbares ly honger en hulle menigte droog uit van die dors. Jes. 5:12 en 13.

Wanneer die oes tydens die voleinding van die wêreld ingesamel word, sal die engele die onkruid (drabok) bymekaar maak en dit met vuur verbrand (Matt. 13:40 tot 42). Die regverdigdes sal dan soos die son in die koninkryk van hulle Vader skyn (Matt. 13:43). Hulle sal in YHVH se skuur bymekaar gemaak word.

⁴⁰Net soos die darrel bymekaargemaak en in die vuur verbrand word, sal dit wees aan die einde van hierdie wêreld:

⁴¹ die Seun van die mens sal Sy boodskappers uitstuur en hulle sal uit Sy Koninkryk bymekaarmaak al die struikelblokke en die wat wetteloosheid beoefen

⁴² en hulle in die intensiteit van vuur gooi. Daar sal gehuil wees en gekners van tande.

⁴³ Dan sal die onskuldiges skyn soos die son in die Koninkryk van hulle Vader. Wie ook al 'n oor het wat wil hoor, laat hom luister.

Matt. 13:40 tot 43

Volgens hierdie gelykenis groei daar koring en drabok in YHVH se Koninkryk. In die gemeente (vergadering, kerk) van Yeshua Messias is die waarheid en die leuen dus teenwoordig. Die gelykenis van die suurdeeg (Matt. 13:33) bevestig dit. Die suurdeeg van leuens en misleiding word deur die vrou in die meel ingewerk sodat die twee nie meer van mekaar onderskei kan word nie. Nou is die suurdeeg in die meel weggesteek.

Alleenlik die kenner kan koring en drabok in die vroeë stadium van groei van mekaar onderskei. Net so sal slegs die kenner YHVH se waarheid en Satan se leuen kan onderskei. Om hierdie onderskeid te kan maak, moet jy egter YHVH as Vader en Sy Woord waarlik ken en vertrou as die waarheid. Die Woord van YHVH onderrig jou in die waarheid en stel verkeerdhede reg (2 Tim. 3:16 en 17). Elkeen moet 'n werker wees wat hierdie waarheid suiwer kan onderskei en kan verkondig (2 Tim. 2:15). Dit is hoe die koringsaad van waarheid en die draboksaad van misleiding van mekaar onderskei kan word.

Die Woord van YHVH gaan elkeen oordeel (Joh. 12:47 en 48). Elkeen sal gemeet word aan wat YHVH in Sy Woord verklaar. Die verantwoordelikheid berus op elkeen om seker te maak dat dit wat geglo word wel die waarheid is. Is dit die koringsaad van waarheid of die draboksaad van leuens? Onthou dat hierdie onderskeid dikwels baie moeilik is!

Ons moet van alle vooroordele en leerstellings (oorleweringe) van mense ontslae raak en terugkeer tot die koringsaad van waarheid.

Elkeen moet 'n leerling van die Groot Leermeester Yeshua word (Matt. 13:52; Matt.23:8 en 10) en **nie** van Rabbynse Judaïsme nie!! Ons moet ontvanklik vir tereg wysing wees. Indien ons verkeerd is, moet ons dit weet en gewillig wees om by die waarheid aan te te pas.

People do not believe lies because they have to, but because they want to – Malcolm Muggeridge

The greatest gift of sight is to see as Messiah sees – E. Clayton Calhou.

Bepeins of Bespreek

1. Die koring en die drabok groei saam en sal eers tydens oestyd geskei word. Is jy die opbrengs van die goeie saad, naamlik 'n kind van die koninkryk, of is jy die opbrengs van die draboksaad van die Bose (Matt. 13:38)? Het jy die koringsaad van waarheid ontvang wat ware lewe gee of die draboksaad van leuens wat jou sus en valse gemoedsrus gee?
2. Wanneer laas het jy dit wat jy glo, getoets aan die hand van YHVH se Woord – van Genesis tot Openbaring? Kan jy dit wat jy glo uit die Skrifte bevestig of glo jy dit op grond van iemand anders se verduideliking? Het dit wat jy glo vir jou die waarheid geword omrede jy dit glo, of glo jy wat jy glo omrede dit die waarheid is? Lees jy die

Skrifte met die doel dat dit moet bevestig wat jy reeds glo, of lees jy die Skrifte met die doel dat dit jou moet oortuig van wat jy moet glo?

YHVH se Mate en Gewigte

Jy mag nie verskillende weegstene, 'n grote en 'n kleintjie, in jou sak hê nie. Jy mag nie verskillende mates, 'n grote en 'n kleintjie, in jou huis hê nie. Jy moet 'n vol en korrekte gewig hê; jy moet 'n vol en korrekte maat hê sodat jou dae verleng mag word in die land wat יהוה, jou God, jou gee, want elkeen wat hierdie dinge doen, elkeen wat onregverdig optree, is verwerplik vir יהוה, jou God. Deut. 25:13 tot 16

Die letterlike betekenis van hierdie onderrig en instruksie is dat ons geen onregverdige wins uit ons naaste mag maak nie, of hom op enige ander wyse mag uitbuit nie, *want elkeen wat hierdie dinge doen, elkeen wat onregverdig optree, is verwerplik vir יהוה, jou God.*

Daar is ook 'n belofte gekoppel aan die nugesette gehoorsaamheid aan hierdie opdrag, naamlik: *sodat jou dae verleng mag word in die land wat יהוה, jou God, jou gee.*

Maar daar is 'n dieperliggende geestelike betekenis wat ewe belangrik is! Ons moet beseef dat YHVH het mate en gewigte waarmee Hy ons meet en weeg!

want ons gaan almal staan voor die troon van Die Gesalfde Een sodat elkeen betaling kan ontvang volgens alles wat hy in die liggaam gedoen het; of dit goed is of boos. 2 Kor. 5:10

Die Tanakh herinner ons ook aan koning Belsasar van Babilon wat ook geweeg was (Dan. 5:25 tot 28, AOV):

En dit is die skrif wat geskrywe is: Mené, mené, tekél ufarsín. Dit is die uitleg van die woord: Mené – God het u koningskap getel en daar 'n einde aan gemaak; tekél – u is op die weegskaal geweeg en te lig bevind; perés – u koninkryk is verdeel en aan die Meders en Perse gegee.

Belsasar het hom teen YHVH verhef en in sy hoogmoed YHVH nie vereer nie en daarom is hy deur YHVH geweeg en te lig gevind. Hiervolgens sien ons dat YHVH ons gesindhede, motiewe, begeertes, woorde, dade, ensovoorts weeg en meet.

'n Regte weegtoestel en weegskaal kom van YHVH, al die weegstene in die sak is sy werk. Spr. 16:11.

Die rede hoekom YHVH ons 'weeg' en 'meet' is om ons daarvolgens te oordeel. YHVH gebruik Torah om die gewigte en maatstok mee te eik en daarom is Sy weging en meting regverdig en akkuraat.

Die probleem kom egter by die gewigte en maatstok wat ons gebruik om ander mee te weeg en te meet. Wanneer ons 'n persoon oordeel (bespreek) is ons inderwaarheid besig om daardie persoon te weeg en te meet. Ons oordeel ander egter verskillend as wat ons onself oordeel. Ons is dan soos die oneerlike handelaar en gebruik verskillende gewigte en mates wanneer ons onself weeg en meet as wanneer ons ons naaste weeg en meet. Daarom het Yeshua gesê:

“Moenie oordeel nie sodat julle nie geoordeel word nie, want volgens die oordeel waarmee julle oordeel, sal julle geoordeel word en met die maat waarmee julle meet, sal dit vir julle uitgemeet word. Waarom sien jy die splinter in jou broer se oog, maar die plank in jou eie

oog merk jy nie op nie? Hoe kan jy vir jou broer sê: 'Laat my die splinter uit jou oog uithaal en let op, daar is 'n plank in jou eie oog? Toneelspeler van 'n valse karakter, haal eers die plank uit jou eie oog uit, dan sal jy kan sien om 'n splinter uit jou broeder se oog uit te haal!
Matt. 7:1 tot 5.

Hy het ook vir hulle gesê: "Oorweeg dit wat julle hoor; met die maat waarmee julle meet, sal vir julle gemeet word en daar sal bygevoeg word, vir julle wat hoor. Mark. 4:24

Geen mens meet met YHVH se maat van genade nie en Jakobus herinner ons: *Julle moet so spreek en so doen soos diegene wat deur die wet van vryheid geoordeel sal word. Want die oordeel sal onbarmhartig wees oor die wat geen barmhartigheid bewys het nie (Jak. 2:12 en 13).*

Let op wat Jakobus in vers 13 sê: *die oordeel sal onbarmhartig wees oor die wat geen barmhartigheid bewys nie.* Dit beteken dat weens ons eie onbarmhartigheid verbeur ons Vader-God se liefdevolle barmhartigheid wanneer Hy ons oordeel.

1 As gevolg hiervan is daar nie 'n verskoning vir jou, o mens wat jou naaste veroordeel nie, want waaroor jy jou naaste oordeel, is jyself skuldig aan, want jy wat oordeel, doen dieselfde dinge,

2 maar ons weet dat die oordeel van God in waarheid bestaan oor die wat sulke dinge voortdurend doen.

3 Hoekom dink jy, o mens, wat hulle veroordeel wat sulke dinge voortdurend doen en dit sélf doen sodat jy die oordeel van God sal ontvlug?

4 Of waag jy dit teen die rykdom van Sy sagte goedheid en teen die geduld van Sy Gees en teen die plek wat Hy vir jou gegee het en beseef jy nie dat die sagte goedheid van God jou wil lei om van die sonde af weg te draai na God toe nie?

5 As gevolg van die onsensitiwiteit van jou verstand, wil en emosie wat nie wil wegdraai van sonde af nie, versamel jy vir jou 'n skat van toorn vir die dag van die toorn en openbaring van die regverdige oordeel van God.

Rom. 2:1 tot 5.

Dikwels laat ons na om ons eie sonde te oordeel en is ons vinnig om onself te regverdig. Dit herinner ons aan die gelykenis wat Yeshua vertel het van die Fariseër en die tollenaar (Luk. 18:9 tot 14). So dikwels bid ons die Fariseërsgebed van: *o God, ek dank u dat ek nie soos die ander mense is nie....* terwyl ons almal eerder ons kop in skaamte moet laat sak en op ons bors moet slaan terwyl ons die tollenaarsgebed bid van: *o God, wees my, sondaar, genadig!*

Ons almal het 'n geneigdheid om onself bo ander te verhef en ons doen dit meestal sodat ons beter oor onself kan voel.

If we judge ourselves from below, it will not be necessary for YHVH to judge us from above –
Unknown

We are very good Lawyers for our mistakes and very good Judges for other's mistakes –
Anonymous

Ons moet onself oordeel aan die hand van YHVH se Torah soos dit in Yeshua volbring is. Dit is Sy mate en gewigte wat Hy vir ons in die huidige lewe gegee het en waarmee ons eendag gemeet en geweeg sal word wanneer ons voor die Regterstoel sal verskyn.

YHVH se Mate en Gewigte vir Redding

Gebruik YHVH dieselfde stel mate en gewigte vir alle mense wanneer dit kom by redding deur Sy onverdiende guns? Is hierdie mate en gewigte vir ons 'n geheimenis?

Die vraag is dus: Word die Torah-gehoorsame Jode wat Yeshua verwerp eweneens gered as die vreemdeling (nie-Jood) wat glo in Yeshua as die gekruisigde en opgestane Messias tot versoening met YHVH? Is bestudering van die Torah van Moses en onderhouding van hierdie gebooe voldoende om redding tot gevolg te hê?

Onlangs het ek 'n epos ontvang waarin die sender die volgende uitlating maak: *Uit jou skrywes lei ek af jy ervaar tans alle Ortodokse Jode as adders, skynheilig, met geen verhouding met die Vader nie en geen waarheid in hulle nie...!* My reaksie hierop is dat dit 'n goeie opsomming is van wat Yeshua van die Fariseërs (Rabbynse Judaïsme) gesê het (Matt. 16:6, 11 en 12; Matt. 23:13 tot 15; Matt. 23:25 en 27; Joh. 8:42 tot 47)². Dit was die mate en gewigte waarmee Yeshua die Fariseërs mee gewee en gemeet het!

Hierdie persoon het ook die siening dat ons nie kan oordeel of 'n Torah-gehoorsame Jood wat Yeshua verwerp, gered is of nie. En dit ten spyte daarvan dat die Skrifte van die nuwe verbond ons leer dat Yeshua is die Weg, die Waarheid en die Lewe en dat daar nie 'n ander wyse is om na die Vader te kan gaan as deur Yeshua Messias nie (Joh. 14:6).

Terug by die vraag: Is vertroue in die Torah van Moses vergelykbaar met vertroue in Yeshua? Die Apostel Petrus gee vir ons die antwoord!

- 17 *As julle jul op Hom as Vader beroep, wat onpartydig oordeel volgens elkeen se dade, leef dan in respekvolle vrees gedurende dié tyd wat julle vreemdelinge is*
- 18 *omdat julle weet dat julle nie deur verganklike dinge, silwer of goud, losgekoop is uit julle leë dade wat tradisioneel deur die vaders oorgedra is nie,*
- 19 *maar deur die kosbare bloed van die Lam, waarin geen gebrek of vlek is nie, wat Die Gesalfde Een is,*
- 20 *wat wel voor die tyd hiervoor aangestel is, voor die vorming van die wêreld, maar in hierdie laaste tye openbaar is, om julle ontwil.*
- 21 *Julle, wat deur Hom, in God, wat Hom uit die dood uit opgewek en aan Hom eer, lof en aanbidding gegee het, vertrou het sodat julle vertroue en versekerde verwagting in God kan wees,*
- 22 *soos julle lewens afgesonder sal word in gehoorsaamheid aan die waarheid en gevul word met liefde, sonder aanneming van 'n persoon sodat julle mekaar sal liefhê uit 'n skoon en volmaakte verstand, wil en emosie,*
- 23 *soos mense wat van bo af gebore is, nie uit verganklike saad nie, maar uit onverganklike, deur die Lewende Boodskap van God, wat tot in ewigheid bly,*
- 24 *want alle vlees is soos gras en al die eer en lof van die mens soos 'n veldblom. Die gras verdor en die blom val af,*
- 25 *maar die woorde van ons God bly tot in ewigheid en dit wat Hy gesê het, is die goeie boodskap wat aan julle verkondig is. 1 Pet. 1:17 tot 25.*

² Daar is baie wat ons by Rabbynse Judaïsme kan leer, maar ons moet uiters versigtig wees wat ons by hulle leer, soos wat ons ook versigtig moet wees wat ons by die Christendom leer. Ons moet egter nie die kind met die badwater uitgooi nie. Maar ons wil egter nie weer mislei word nie!

Let daarop wat Petrus in verse 17 tot 19 skryf, naamlik:

- YHVH se oordeel is onpartydig. Hy gebruik dus slegs een stel mate en gewigte waarvolgens Hy elkeen se dade oordeel (vers 17).
- Ons word nie deur verganklike dinge losgekoop van ons leë dade wat tradisioneel deur ons vaders oorgedra is nie, maar slegs deur die kosbare bloed van die Lam van God. (verse 18 en 19). Die leë dade van die vaders is die werke van die Torah van Moses. Redding is alleenlik deur vertroue in Yeshua en nie deur werke van die wet nie (Rom. 3:20 en 28).
- Elkeen wat glo in Yeshua as die Messias word van bo af gebore (wedergebore), nie uit verganklike saad nie, maar uit onverganklike goeie saad (vers 23)!

Slotsom: Yeshua Die Gesalfde Een is YHVH se mate en gewigte vir elke mens se redding!

Die feit is – dit is indien geglo word dat die Skrifte van die nuwe verbond deur die Gees geïnspireer is – dat ortodokse Jode wat Yeshua verwerp nie die Koninkryk van YHVH sal beërwe nie. Daarom sê Paulus dat hulle het hulle eie geregtigheid opgerig en ken nie die geregtigheid van YHVH nie (Rom. 10:1 tot 3). Ja, Rabbynse Judaïsme het die ywer, maar sonder kennis van YHVH se geregtigheid in Yeshua Messias. Hulle het kennis van YHVH, maar ken hulle Hom regtig soos wat Yeshua in Joh. 17:3 dit stel?

Daarom is dit vir my ‘n groot tragedie dat die Messiaanse Beweging daarvan wegstroom (versuim) om dit ‘n prioriteit te maak om Yeshua as Verlosser aan ons broers van die huis van Juda te verkondig. Die ingesteldheid van die meeste in die Messiaanse Beweging is ‘n ywer vir eenheid tussen die huis van Juda en die huis van Efraim, maar sonder eenheid in Yeshua. Dit is vals eenheid, want ware eenheid is slegs moontlik in Yeshua!!

Moenie saam met ongelowiges gejuk wees nie. Watter deel het onpartydige opregtheid met die oortreding van die wet en watter gemeenskap het lig met die duisternis? Of watter ooreenstemming het Die Gesalfde Een met die teëstander; of watter deelname het die wat vertrou met die ongelowige? 2 Kor. 6:14 en 15.

Die Messiaanse Beweging versuim hulle Matt. 28:18 en 19 opdrag teenoor Rabbynse Judaïsme!! As ons werklik die ortodokse Jode en die huis van Juda liefhet, behoort ons met ywer hulle van Yeshua te vertel!

Bepiens of Bespreek.

1. Kan iemand ‘n verhouding met YHVH-God sonder Yeshua hê? Lees weer wat Yeshua in Joh. 3: 1 tot 12 aan Nikodémus, ‘n Fariseër, gesê het. Sekerlik geld dit steeds ten opsigte van Rabbynse Judaïsme! Lees ook wat Yeshua in Joh. 17:3 gesê het aangaande die ewige lewe!
2. Is diegene wat glo dat ortodokse Jode wat die Torah van Moses onderhou, maar Yeshua verwerp ook gered is, nie skuldig aan geestelike moord van die Jode nie? Het die verlossing deur Yeshua nie juis na ons, die nie-Jode, gekom om die Jode wat Yeshua verwerp jaloers te maak nie (Rom. 11:11)? Is dit moontlik om hulle jaloers te maak deur nie openlik deur woord en daad van Yeshua as Messias te getuig nie? Rabbynse Judaïsme moet jaloers gemaak word oor wat ons in Yeshua as Messias het!

3. Indien dit waar is dat ortodokse Jode wat die Torah van Moses onderhou, gered is, dan hoef ons nie bekommerd te wees oor diegene in die Messiaanse Beweging wat Yeshua verwerp en dan Judaïseer nie, want dan is hulle steeds gered! Is dit waar in die lig van die Skrifte van die nuwe verbond?
4. Beteken die opdrag dat ons nie mag oordeel nie, dat ons ook nie 'n mening in die lig van die Torah van Messias mag vorm nie? Volgens John Wesley's Explanatory Notes beteken Matt. 7:1 die volgende: *Judge not any man without full, clear, certain knowledge, without absolute necessity, without tender love.* Miskien kan ons byvoeg: *en om eerstens onself ook volgens dieselfde mate en gewigte te oordeel.* In die verband moet ons ook die volgende onthou:
 - ❖ In Matt. 7:15 tot 20 sê Yeshua dat ons wel mense aan die vrugte wat hulle dra moet oordeel. Die vrugte wat by bekering pas word volgens YHVH se mate en gewigte gemeet en geweeg!
 - ❖ YHVH het tog regters (*shoftim* – parashah 48) aangestel om volgens die Torah van Moses te beslis en te oordeel. Om heen te gaan en die blye boodskap van redding deur Yeshua te verkondig en almal te leer om alles te onderhou wat Yeshua ons geleer het, behels tog ook om dieselfde mate en gewigte as YHVH toe te pas!

-0-0-0-0-0-0-0-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.
Johan.

Epos: kontak@nuwelielied.info
Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.